

COLECTIVOS Dez asociacións culturais de Galicia únense para reclamar que a Xunta declare o Panteón de Galegos Ilustres "nacional, público e laico"

A base reactivábase

Crítican "o desprezo do Goberno galego pola nosa identidade e pola nosa cultura" por asumir o seu peche

maré • Santiago

Dez asociacións culturais de Galicia acordaron traballar en conxunto para reclamar que o Goberno galego declare o Panteón de Galegos Ilustres "nacional, público e laico". Segundo informan nun comunicado, as asociacións Alexandre Bóveda (A Coruña), A Pomba do Arco (Foz), Auriense (Ourense), Campo de Estrelas (comarca de Compostela), Maio Longo (Pontevedra), Medulio (Ferrol), Meiramar-Axóuxeres (Morrazo), O Galo (Santiago), Solfa (Santiago) e Vagalume (Tabeirós-Terra de Montes) reuníronse en Compostela este fin de semana para abordar en conxunto "a situación cultural do país, desde a xestión en materia de cultura do goberno galego até o traballo na intervención cultural de base" dos propios colectivos.

A conclusión á que chegaron foi a "necesidade dunha maior coordinación das asociacións galegas que nos permita desenvolver proxectos conxuntos e tamén reaxir con rapidez e eficacia diante de situacións graves para o noso futuro cultural e nacional".

Estes colectivos reunidos manifestaron o seu "total desacordo coa privatización e peche" do recinto do Panteón de Galegos Ilustres así como a súa "perplexidade polo desinterese e falta de reacción por parte da Xunta de Galiza". En opinión destas asociacións, "cerrar un espazo onde repousan símbolos da cultura nacional como Castelao e Rosalía mostra, cando menos, unha tremenda falta de sensibilidade por parte da Igrexa; asumilo como algo normal, sen o menor intento de solución, amosa a despreocupación e o desprezo do Goberno galego pola nosa identidade e pola nosa cultura". É por iso que es-



A tumba de Rosalía de Castro no Panteón de Galegos Ilustres en Compostela

||| "O LEGADO DE ROSALÍA" |||

Adhírense ao acto dos escritores

As asociacións culturais acordaron tamén adherirse aos actos de conmemoración do 125 aniversario da morte de Rosalía de Castro que celebrará a Asociación de Escritores en Lingua Galega o vindeiro 15 de xullo en Compostela.

Ao ver dos colectivos, "os responsábeis culturais do goberno, esquecendo a principal figura da nosa historia literaria, desaproveitan unha oportunidade única de daren a coñecer o inmenso legado da fundadora da nosa literatura nacional. É por iso que chamamos todas as asociacións culturais de Galiza a sumárense tamén a estes actos", apuntan.

Este acto organizado polos escritores galegos arrincará na estación da Matanza, preto da casa de Rosalía de Castro, onde un tren identificado como Follas Novas partirá o día 15 ás 17:45 horas, para facer o traxecto Padrón-Compostela. Unha hora antes, ás 16:45, haberá unha concentración na colexiata de Santa María de Iria, no cemiterio de Adina, onde o presidente da AELG, Cesáreo Sánchez, informará do sentido dos actos, á vez que se lerá un poema de Rosalía de Castro. En Santiago, o cortexo lerá poemas de Rosalía nas prazas do Toural, a Universidade e Cervantes.

tas asociacións culturais reclaman un "Panteón Nacional público e laico", e agardan que o Executivo galego "desenvolva as xestións necesarias para se facer coa titularidade do recinto".

Ademais, acordaron iniciar a constitución dunha "entidade federativa" que lles permita desenvolver proxectos conxuntos e traballar de forma coordinada no futuro. O proxecto, que botará a andar o vindeiro outono, trata de "optimizar recursos e ser máis eficaces no desenvolvemento do traballo cultural de base", un traballo que "está a reactivarse e a facerse cada vez máis necesario de termos en conta o desinterese da Consellaría de Cultura en apoiar as nosas manifestacións culturais ou mesmo a minusvaloración e o desprezo que ten manifestado o conselleiro pola nosa cultura nacional". ●